

# **CHAVARUL**

## **Njianthaimeipu**

## **Tuang Latding**

**Saint Kuriakose Elias Chavara**



# **CHAVARUL**

## **Njianthaimeipu Tuang Latding**

**Saint Kuriakose Elias Chavara**

**2020**  
**Chavara Central Secretariat**  
Chavara Hills, Kakkanad, Post Box 3105  
Kochi 682 030, Kerala, India

# *Njianthaimeipu Tuang Latding (1868)*

Original in Malayalam: *Oru Nalla Appante Chavarul*

*Author*

**Saint Kuriakose Elias Chavara**

*Rongmei Translation*

Levis Jaojiandaipou Kamei & Carmel Kamei

© 2020: Saint Chavara's 150<sup>th</sup> Death Anniversary Edition  
Chavara Central Secretariat, Kochi

*Special Thanks*

CMC Sisters, Sanjoe Province, Dimapur

Fr. Jacob Tuthonpou Pamei

Bro. Leo Phakhuimi Kashung

Lanchaliu Kamei, Jovita Lumtanliu, and Hannah  
Machunthuailiu

Fr. Jerin Kolamkanny CMI

Cover Design: Printartz, Kochi

Layout: CCS, Kochi

Printing: Viani Paintings, Kochi

**Chavara Central Secretariat**

Chavara Hills, Kakkanad, Post Box 3105  
Kochi 682 030, Kerala, India

# **KAJAOMEI**

Katgutloumei	9
Dinkasuak Loumei	11

## **Part 1**

Kaikhum Akhat Rui Tan Nimei Tuang	13
Thou	
Njianmei	13
Niammei	14
Riangluai Khatni Ruprian	15
Alingmeih	15
Jaojian Thaimei Tan	16
Nchummei Latjan Ta Lani O	17
Raguang Ta Pingthaimei	18
Khaengthaimei	19
Latrik Book Gaimei	19
Ngaekmak Numak Mei Tingmik	20
Tingmik-thui Tuang Tanduan	20

## **Part 2**

Nahnun Ta Kasiam Thaomei	23
Saint Kuriakose Elias Chavara Rui	27
Lungloumei Pari Ruanri	
Kaikhun Khang Saint Chavara Khou	29
Huanei Mei Rasuai	
Saint Kuriakose Elias Chavara Tuang	31
Maru Sumei Panti	



# KATGUTLOUIMEI

Njianmei ananunthiu,  
Janv khou khatni jeic khou, ai hei  
Kuriakose Chavara, Chennamkary tuang  
parish tuang nah mpou the. Ngampri mei  
Ragwang rui ata mi mban khou phung  
guanglou khuan e. Mi kaikhun khou  
khatnni mi puipu khou puan guang lou na,  
mi hei kalunlung tuang di the tumei kiu  
thu, jeanthaimei khatni chummei khou,  
thuankuna siamruai subam khang dithe.  
Kumbam khuan sini, gaimei tan asek tan  
lou mei na di the, baimei biurap mei tan ai  
rui nangniu khang tanlou kan makge.  
Kumpui jaeng khou rui airui nangniu khou  
milat hei hilou du tuang the. Milat kaeng  
hei thu ai rui theina tat kan sini nai bam  
duc puni the. Kumna, Kainakari church  
khou mei ananun thiu, ai rui mei lat hei  
kungmei lanv suna sinlou duv tuang the.

Mihei atuang khammei alunglat nangniu  
khou, akaina achai sumei khatni  
kaikhunmei guai khatni nah sumei nun,  
bumaeng khou khatni, jankhou kadi lou  
tuang the. Mi heirui madan mei sukan diu  
tho mi kiu thu nangniu hei abanh sinsuk  
mei nun the tuna. Kasing chak dat ngam

makmei Ragwang tuang jaojian nangniu khou tilou mei hei nangniu tuang ramgai rui rana hammakge tiki nangniu pu pou tuang njianmei khatni lumnumei rui e. Kumpui jeang rui nangniu mi hei aman mak khang su ni na e. Mi hei ningtou na bam mo mi khiu thu mi mbanh khou ai rui guang lana khatni ai rui mi tuang lat bam hei nganolou du puituang e, kaikhun khou rilou na khatni ningtou na bam khang e. Mituang original copy hei chapel tuang box khou rilou khang the. Buh tuang rei mei Sunday kathui khou, nangniu mei guai na guang kariu lana pa o. Mei hei rui atuang thei mei tingmik ta tingkum kathui ningtou na bam khang the, mihei ram na baimei ningtou khang mak ge.

Khammei suna, buh pum hei, mei tuang testament hei pa lana, akhin suna rasuai akhatna suai lou o: “O! Kaipou, Nangbang tuang bumaeng hei chummei guai tuang bamduan khou ti jaengthaek lou o.”

## DINKASUAK LOUMEI

Gaimei Christian tuang kaikhun hei rui tingkao tuang lun lianlou tuang e. Kaikhunh akhat tuang kabah hei kaikhun meiguai na lung kariu lana jeiriang khou khatni jianmei khou, nahnum rui puipu chakhuang champou sumei khatni lat piumei, Ragwang hu khou khatle khatta chujangna lung mei, tingsaengjaeng tuang ringsuangmei ring bam ta kamei kamei rui phuna lung mei hei e. Kandih panti tuang nchanmei khatni rianra jaengsi mei khourui jaengthaek bam hei tho jianmei, kariak nchummei khatni chujaengmei nai-meい kaikhunkhou lungmei hei e. Mi hei kummuai na, jaengsi liangmei kiu thu, kariak chumna lung makmei khatni chujaengmei makmei kaikhun khou lungmei, Ragwang siamruai sukhang thaimak mei khatni ringsuang mei ringbam phu thai makmei hei e.

Adih jaengsi cho khatni sansi dai mei cho thou kummei kaikhun khou kariak chumna lungkhang ning makmei nun tei mu? Lungai chingkhiu mei, kajan tatmei khatni chakhuang champou sulou numei kaikhun aju kasi kancho? Hei kummei

kaikhun khou lungmei nun tuang kheiliak  
khatni lungning rui agai agi mei, paap  
tanh mei, su kasi karou mei khatni  
theisumei pat kan tu cho? Tingkao thang  
rui guangmei ningting khatni chujaengmei  
lungning tilou khang huainei lana ai rui  
kasiam lou e, kaikhun khou piu lou tina  
gainimei lungriak, mi hei rui paap tan  
nimei khou rui khatni kasi karou mei pat  
nimei khou rui, kabam kaji thai mak mei  
lunlung pat ni mei khou rui kanlou nu e. I  
rui nangniu meiguai nakhou jaenghuai e  
mikiu tho nangniu lungning kapum rui mi  
tuang lungriak hei machunna piu lou o,  
nang pu nangpou rui kadi lou du mei lat  
the.

# Part 1

## KAIKHUM AKHAT RUI TAN

## NIMEI TUANG THOU

### Njianmei

1. “Nangniu khatle khatta njianno”  
(John 13:34) Nangniu khatle khat tuang suaimei khatni suanmei ta kuak lou kari o. Nang mi hei piu e thei, chujengmei kandih khou latou puni khatni tingsaengjaeng tuang suan tingkao khou latou puni adihnakha. Jaengsi kan tu cho kaikhun khou nuna makmei khatni karaeng jaoji mei chana puna khatni suanrei panrian khou naimei hei. Aniu kaipou kamei kahak rui salou e mikiu thu Guangdih kathui karana kata houthouna khaklang ethei, aman mei pat re. (Mat 12:25). Kaikhun khou nuna mei makna agai-agи mei kaniu kak khou pat re thei, kaikhun tei aman puni. Nangniu rui nangkai kaikhun mei gankhat tuang suai mei khatni kakhuai kuak lou ngam mak ge thei, nangta ni akum na kaniu rui kuaklou nina cho? Nangrui huthang tan khuai lou nimei ta kuak lou punide tuna

lumgai e thei, kaniu rui asei tan khuai lou mei ta nang kuak lou lak na cho? Nangta khuai lou mak mei tana kha jian bam khuan ethei, Khrista ta thai mak mei nun khatni gin nun rui subam mei tei lav cham de. Nangpum kahak rui nuna na, katuak rianra mei, aniu pupou Adam rui tanlou kanmei tei tan kaluai dat nihe nacho? Kaikhun khou ti agai-agи bammei guai khang jaengsi dai mei nai e.

Karapei akhat kaikhun khou ti agai-agи pat lou (mei pari akhat nai) khuane. Nthiammeipу rui kahukhou guang lana kachaek khou padik mei akhat ti lana kata tei maikuam thang duang tat kan khuan e kajib khang the tuna kalam kiu thu mei karapei tei rui tingmik kathum khou tanlou khuan e nthiammeipу rui tingkum 3 khou tanpat ngammak mei tan tei!

Kaikhun akhat tuang champou mei khatni suaihiam kiuthu agai-agи makna, khatle khata pari gaina lungcham bammei tei e. Khouring sini kaniu ta jaojimei ta khumkhang e. Thouna naimei, ningtingmei khatni kagunnaimei nun rui mansei akhat

tuang khuaimei ta tei jaokei louna kuak lou ngam e. Kagan khat khou, Guangh Constantine katuang riganmei nunle tuna cheangluang khou tat pat khuan e, khoutei gankhatpu rui kadaeng khou guang lana kaphi khuan the, katumkaluak na kamei nun tei rui khuai nai meipu ta tei khumkhangna suluai khang nulou o tuna thankhuan e. Khou tei Guangh tei rui dauh khuan e, "Atuang thiam liangmei rihmei rui tanngammei tan tei ai rui tan khuan e thei, akhou gaikasuanmei tabui naina cho? Kumpui jaengrui, ai rui kamei ta kuak lou the khatni meitei rui atuang Guangh akhat sumei tuang gaimei gunc lianlou tuang e."

2. Peikhai kumei rui kaikhun sukasi e. Lat peikai khou phungku lou meipu tei, chum ngan kanmei lat bam khuan sini, phungku lou makge thei gaini tuang, tuna ninghan dat bam e. Phungku loumei rui neihlamei rammakge thei gai tabtabmei la tou makge.
3. Kaikhun tuang kamung-karuang Sunday khat khou pangthuak meihei

gaimak mei thiak akhat re, khamkhou meitei rui Buhmaengh suman lou puni. Sunday hei thu kaipou tuang tingmik ge. Heikummei tuang chummak mei kheiliak khatni lunlung rui kaipou tuang tingmik tihei Nthiammei pu tuang tingmik tiguan lou the. Hei khangsuang nbuna, mi thiak hei gankei nu mei thiak e, Ravguangh rui ni khatni phuamling rui ni numak ge, jaengsi bammei kaikhun tei rui Rakai ku makna, kaikhun tuang kamung-karuang khou kajao bam mei hei.

4. Sian poucmei hei kacha surio, kalam thu mei khang hammakge thei; nangtuang pouv tei katum meilung khou khang dat khang ni karam mo. Meibaimei khangni, nsa timei rammakna, sian tipouc rio. Lunggai liangmei kaikhun kiu pouv phung makmei kaikhun tei e. Nangpu nangpou rui tanlou nimei thou tanlou makna hamethei pouv tuanlou duh e thei, katummei lung khou khanglou o, kalam kiu tho mitei tanlou makna ganlou saeng e thei simei pat puni. Kalam thu Ravguangh tuang

lungpuam heikum mei kaikhun khoutei keilou puni.

## Niammei

5. Nangtuang sianlanv khou tei nanglian ti rio. Kasian kalan khou lianti mei hei pangmei tan e. Asan mak khou, lunggai pui lun sumei nun tei nap neitu puni. Guangh David rui katik kangam khoutei kalianti lana, katuang Guangdih khoumei meising phuc khuan e; khoutei Ravguangh tuang lungpuam keilou na, rapian guang lana mansei kasing geina thei kan e (2 Sam 24).
6. Siandui liamphu-liampha na sinsu rio, khatni nangkhou naimei khou tei rui hian na kamung-karuang khum-ngai khou sinsu rio kalam kiu tho aniu rui sangam makge mithiak tei asan douna sungam ni na cho. Thaomai louna gancaeng na gan bammei tei rui napgou-mai ganran na gan amit dat nuang kanmei tei suang gai e. Ningtingmeipu Democritus khou thou tei rui mansei pangkhou gailiangmei cho tuna than tina, kamei rui kumna sadao khuan e; “kalianti makmei mei tei rui dailiang e” tuna dao khuan e.

Neihkhat hei ningtingmei pu akhat rui, kachun suna bammei pu akhat, khum-ngai suna nousuan mei mung khou kasian-kalan sinsu ngamna lungsi hak na lungbam meipu khou sa khuan e: “channathiu, nangtuang thaomei tei ting-gan khou danmut ngam lou mak khuan e thei, Jinbang dan khang nai ni tuang khuan e.”

### Riangluai Khatni Ruprian

7. Kai-kai khou tat lana meikairam tuang lam kathai rio. Kalam kiu thu nangrui nangtuang tan nimei thou tei thuina tanchui na tan e thei, meibaimei tuang gaeng makmei lam kathai khang kagan naini tuang ram makge.
8. Raguangh ta pingmakmei khatni lungriak chumna lungmakmei nunta ruprian su rio. Kalam kiu tho, lunggai-chingkhiu mei rui gaimei khatni neihlamei kaikhun khou phungguang mak ge tiki kariak chumna lungmei khatni Raguangh ta pingna lungmei rui e. Kaikhun aju rui chunsi-jaengsimei khou khatni kasi-karou mei khou keilou kantu cho kalam kiu thu kaniu rui lunggai-chingkhiu meita

pam sukhou rui e. France khou, gankhatpu kana npouh akhatna mei nai khuan e. Kamei rui kana npouh akhatna mei nai khuan e. Kamei rui kanapu ta tei saengmei-daimei kaikhun khoumei tuna-pui ta tikao khang peina karam khuan e. Nao-suanmei tingmik tei rianlou the nunamei akhat lungkhou, mi kiu tho, kapu-kapou tuang sianlan guai kanapu jankhou lou na. Kagan asaek tang hei, kanapu khatni kamaoh-pui tuang kaikhunmei guai rui, kamei tihei kasian-kalan makmei mansei dithe tuna karaeng-mala khuan the, kum lana kakai khou tei rui kata kathao pat the. Kamei rui kabung nguh nukhang nap neitu tat khuan the khatni kanapu kairui kamung-karuang khou tusaek jangsaek loumei tei khui tu bam khuan e.

9. Nangkai khou mansei kathui ta lalou riu, tiki kakheiliak gaimei khatni Raguangh ta pingmei nunta lalou o. Latchiam suna sabam mei kumna “nangpam mei lunlian lou o kum e thei nang thoucho tumei ai thai puni.”

10. Mansei kathui rui thai kandiu mikiu tho nangkai hei latsi latrou samei, Christian mei akhat rui salak nimei lat, nsu nraomei khatni gankhatta ham e thei kaigei lou ningta khaklanghmei bam ham mak ge tumei nangrui mi hei thai nina e tumei tho, simei lat samei nunta lalou ethei, nangru khou dandi guang puni. Mansei gankhat pu, meikai ram lam sa kasi na tat bam meipu nai khuan e. Kham khou tho kamei hei karana kabaleih puam na, nthan gut na thei kan e.

### **Alingmeih**

11. Sianlan akhatni pum aman nimei puat khatni puat kadat-datmei khou lung-gut rio; miphane tei nangkhon naibam mei puat nun tei kasiam chui o. Kaikhun akhat tuang lan kiu tho, puat-chei kasing geina naimei tei rui ham mak ge tiki kagun naimei tei rui e. Alingmei putei kakhon naimei puat asek tei rui pian na neihla e. Kum tina kata manma-meい nunrui kakhon kaman kungmei puat rikam lou tina khuang the tuna peikai khou phung ku lou khuan e. Guang tei rui katum kaluak na latdan pat khuan e meipu

tuang puat guai tei kasing chak na phu gut khang. Kum e tiki meipu tatei kakhuai makge tuna gaina patlou dat khuan e, kalam kiu thu kakhang naimei tumei hei laophung laona akhat nai khuan e, milao khou tei kamei rui tanranv na katuang talangdui kei lou pukhou, lao tei kachaek lao guan khuan e.

12. Nang tan kaji rap mei tan tei tan nina e. Tan-tan khang numu mei nun tei chakhuang sulou numei kheiliak ram makge. Tiki kaniu tei ntunh makmei, kakai-kalao khatni kakik-kata mak e tuna chak lou e. Aliauhmei hei simei bangbi e; kham khou mi tei rui simei kheiliak khatni joujang mei khou jailou e. Joujang bac mei hei kandih mei guai hu khou khuai dai mei khatni Raguang hu khou siliangmei tan e. Roman mei tuang chief, Kathon rui kum na sa khuan e, thou puni Rome kandih khou lungni mei guai rui tanranv khou rui kaban-danc mei lian nina e khatni meisaeng meidaimei guai rui katuang khusu-khulai sin lana chengdai khou pat nina e.

13. Languanmei hei nangbumeng thei numei tuang e. Khatni nang tuang sianlan aman numei tuang e. Nang khang ringnu mei cheng baimei mak ge thei, languan guang nu makge tumei tuang mak ge. Kum e tiki ramthaina, lungning thanna khatni chumna tan nina e. Chumna languan makmei nuntei katan kaduan kapanty khou gai makge. Guattu khou rui khatni saram khou rui phangmei lan tei gunh kum nungna aman kanni de.

Languanh meipu gannei hei kanei rui kathiak-kathiak su lana guat-pat-guat-gut lana karam the tiki kanei duangaimei phang mak khuan e. Neih khat tho kanei rui kanei tuang khuai guai kalao khuan the. Kanei rui kanei tuang simei khuai guai gan kei lana chumna lung pukhou Raguang tuang suaihiam, tingkum akhat lung khou rui npham-pha na phang khuan e.

### **Jaojian Thaimei Tan**

14. Nangrui mei gan-khat khang gai-tan tanlou makmei tingmik tei ringmei-latrik book hou kasing chaklou makge. Mansei nun rui nangta

pingmei khang suang, meinun rui njianmei khatni champou lou mei ta machun o. Nap-neitu mei pu tei nangkai khou rui kabam nsa-kareng handat mak kandiu; mitei kumna, nangni mak mei nun khang tipat khang nja rio.

Gankhatpu hei gaitan akhatna sini tingmik kathui tanlou tantan bam khuan e. Kalam kiu tho Damlou mei Raguang rui kum nina e tumei tei kamei rui kum khuan e. Neikhat hei kamei rui zinbang naptu khang dungkei meigan khou, kamei rui meinung tei gaitan tanlou makhe tumei kamei ningtou lana naptu thao makhou kamei thao ding lana gaitan tan tat khuan e.

15. Liamphu-liampha na sinsu mei khatni pantimei kanei hei paap be. Pantimeilan tei nthum rui tu puni. Liamphu-liampha mei tuang sian lan tei maikhou kum aman puni. Gankhatpu hei kakaikhun khang kage naimei nthuina jaolou na khatni kamei rui ngammei lungkhou makmei nun khangni njianlou thaina lungbam khuan e. Kamei rui lungduan gaina

lungguang pukhou, njianlou thaimei tan hei kamei tan amu thao khuan the. Khatni karana khang sianlan rithao khuan the. Kagan kanak mei tang hei, katan khou nsu pat khuan the; kamei rui rah-jaona sian pei na ting khuan the. Kumbam tiki banchra rui kahu khou guang na sa khuan e: "Thao puni lungsi-rainra meinun ta njianlou makna karana khang kakhan meinun tei kabam chamak khou sian ting na aman puni."

16. Pam gei na lou rio, tiki chingkhat lungkhous akhatnah kapachui na lou o. Raguangta njianmak mei nuntei nang ta ni kalungning than na njian na tuang ham makge. David le Jonathan rui khat le khatta njian khuan e: kanei lung khatna suna khat le khatta njianna kham mei panti nganv khat le khatta khou-kha khuane. Kanei rui khatle khatta jian-kadan mei hei rian-ra changmei gan guang pukhou thei hanmei tuang mak na jian thuk ran-ran khuan e.

## Nchummei Latjan Ta Lani O

17. Nangkai khou houguangmei puat tei matakhatna khang sini lou khan lou rio. Bumeng nthanmei rui sa lou e, mikiu tho thou puni houguang mei puat rilou puibam sumei kai tei mairui kao puni. Kaihoumei nunle kariu riu, kalam tho, kaniu rui nangtuang puat hou khang rou mak puni. Heikhou tei rui nbuna kaniu tuang paap khou tei nangni kajao puni.

Gankhatpu hei kaihou-guattu mei khou rui lunggai thao mei pu nai khuan e. Kamei rui thei-jih khou jipbam khou katuang khammei lat suna kadih lou khuan e. "Abumaeng hei nthiammeipu khang ganlou the." Khoutei kana nun rui angak lana kapu hei nbah lana khuang the tuna than khuan e. Khoutei naobammei kapu tei rui sadao khuan e. Kum makge ananun thiу, ai bah makge. Ai rui samei hei kaniu kumna hi kandiu. Abumaeng khat ni anou tuang bumaeng nthiammeipu khang ganlou du the, kalam thu anouh rui ata mei gan khat tuangpuat hou khang katiu lou e. Ana nun thiу, nangniu tuang

bumeang ni nthiameipu khang tilou the kalam kiu thu, nangniu jaeng khang riu e ai rui meikaipuat houguang mei. Meilat hei sa lana kamei thei kan the.

18. Nangtan tanlou meinun khang kaphikadam tinian rio khatni timak meituang surio. Mihei Raguang tuang guangbampeng hukhou kapna kaobammei paap be. Lungsi-lungrou meinunta ti-jaosi lourio ham e thei su katuak lao rio, kajengtho Raguang rui kaniu mikdui tei hou lana kummei nun ta tei dandih ti puni.

Leuven tuna kao mei bam akhat khou lunggai meipu akhat nai khuan e. Maipui akhat kana padei le lunggai meipu kai khou kaibang bam khuan e. Lungai mei teirui mikai puina guai ta tei sukatuak lana kaniu lung ti rianra bam khuan e. Neihkhat tho maipui tei rui khang ngam lamak na khuksun keina kalum khuan the. “Oh Kaipou, chum makmei khatni lungrianra meibam khou rui kanlou o.” Dingmak khou rui lunggai meipu tei punkei na thei kanthe.

## Raguang Ta Pingthaimei

19. Kaikhun akhat tuang kaman kungliangmei gunc hei Raguang ta pingmei khatni Raguang khou lunglou mei hei akhat re. Raguangta pingna lungmei kaikhun tei kaothang tuang suaihiam kandih khou lungbam san khatni tingsaeng jaeng latou puni. Raguangta khatni rachapta su kasi mei khatni chakhuang makmei lat sa meinun rui kaikhun akhat tuang gaimei tei muangjingmei rui gumliam kum puni. Ngampui kasang, tingmik kathui Holy Mass kajao o. Mitei tan khang kung e thei, Monday tuang, Friday tuang khatni Saturday tuang Mass kajao o. Kaikhun meiguai tingmik kathui tuang Mass su cham ngam makge thei, tingmik pum kaliang-kaliang lou na Mass kajao tho. Nangpaap kalou na Bumaeng Taektu bu khou tu liang guat-guat ro nangrui na novena rasuai khou khumki ngai khatni aniu tuang pui tuang khumki-ngai, khatni bu-bu tuang sangaimei liuchang khatni Saint Joseph tuang phuamling khou ngai ngam makge thei nangkai khou pana bam o.

Mihei nthukna chiksin na suo mi kiu thu nang rui tat bam puni, jibam puni, dungbam puni, palup-tali bam puni, nangtuang theak tei thanna khatni niam na suo. Niam makmei kheiliak hei Raguang hu khou khatni kandi meiguai hu khou khuai e. Kham mei latjan tingmik khou, tuna ngaan nun rui puan-piu khou khatni kheiliak khou chum mak mei lunlung khou rui bumaeng aju mai-kuam tat puni cho tumei aniu thai puni.

Kakheiliak gaimei khatni niam mei ganpu akhat France khou nai khuan e, kamei rui kapum tei, karana bam khou sini pheirui duam-liam na kaban nganna duam lou na bam khuan e. Kakhou kumna sa lou khuan e, maikuam khou dandi phangmei nun thu pheiban piu mak na paliu puni tumei. Kaniu meitei chu lou lana ping na kap khuan e. Mi tuang ngachapmei khou rui aniu thai e, mei ngaan pu tei kapum ta adi machun cho tumei.

### **Khaengthaimei**

20. Nchanmei, rianramei, nau sunumei khatni tin-duangmei gan khou

Raguang khou nganglou o. Neihla zaenggaimei gan khou na khaengthaimei kamei tei tan-mei rammakge. Lungutna kalum bammei pu akhat rui sakhuān e. Mei kandih khou ram kata na pat bammei guai hei ai rui ningmei khou rana de, kalam kiu tho, Raguang guai ningmei tei ai rui ningmei khuan e.

Saint Ambrose rui kaikhun khat khou tarai lou pui gan khou kakai tei rui salou khuan e tumei tho nao-sunu mei ham e thei chunsi-rianra mei ariu makge tuna, khoutei kamei rui sa khuan e; "Meikai khou rui tat pat rikho, kalam thu Raguang lungpuam jaimei lung khou guang puni the." tuan sa lana tat pat the. Kading khou kaitei mpang-kei lana, kailung khou bammei mansei guaita su luai kanthe. Kalam kiu thu dandi phangmei hei Raguang rui aniuta jianmei tuang khudam e, khatni mitei rui aniu rianra mei gan khou aniu Raguangta phu e.

### **Latrik Book Gaimei**

21. Lumlou makmei nun tuang science tuang latrik book nun rui nthuimakmei

ningting khatni suaimei aju jinlik lou e. Ramaeng kalum meinun tuang latrik book khat nthaboulah mei lulat nun kakha kaduaina kaikhou loumei hei, napgou lap khou maic rilou meile ncham e. Pui-pu nun rui kanah nun khang machunna rilou numei book nun ningting khatni kabah thaimei khatni rachap tatna lung nimei book nun la lou nina e. Nangrui ngampui kasang gaimei book nun kaikhun khou lalou kaduai o.

Napneihtu pu akhat pathaimak hithaimak meipu akhat nai khuan e. Kum e tiki kamei rui meinun rui njian na tilou mei sian khou teirui lairik book liu khuan e; lairik papat thaimei nun khou tei kamei rui tipa lana book khou hilou mei gaimei lat hilou meitei rui kapanty kalai na lungkhan e. Kum na kamei rui mansei guai hu khou lai njei nu mei lunlung lunglian lou khuan e.

### **Ngaekmak Numak Mei Tingmik**

22. Aniu rui Holy Mass kajao mei na rui biu mei dithe tuna ning numak ge; mei phan tei gaimei thiak khou aniu

tuang kagan hei sinsu nina e. Sam na sa pukhou gaicham kingmei, kaba gaimei book pamei khatni gaitan tan mei tumei kiu tho nao sunumei kaikhou tat lou mei khatni lungsi rianra meita khalou mei.

23. Raguang ta pingmei nun tana nangniu kaikhou tan-tan khang lou o. Kumna kaikhun khou tan-tan khang lou mei hei ni nupui kam rao khang su o. Kai khou kasi-kagai jao na bam mei nun khou nthiammeipu rui tan suna simei patmei aju nai e. Kaipou rui kaikhou tan-tan bammei kabang nun tuang kheiliak tei suina jao nina e. Khatni bumaeng khou daithao khang jai lou nina e.

### **Tingmik-thui Tuang Tanduan**

24. Nangrui jip tatmei gan khatni lauthuan jipthao jai meigan tingmik kathui kagan chana su o. Meiguai na rui kaikhun meiguai rui kagan akhat rian lou mei lung khou suai mak khang lai tat ro: Nu e thei tho lauthuan khuang 6:00 am khou kaikhun mei guai rui jipthao lana rasuai-suai khang suo. Kumna, thou puni biumei nun tei rui

Holy Mass kajao o. Naptumei hei lauthuan khuang charuk khou tuo. Khatni baro (12:00 pm) khou kalan taektu tu o. Tingjin kei dat pu khou banchra rui riumei rasuai kalum tang lana meiguai na nchamna kaikhou rasuai suai o. Mi tang khuang makhai dou, gaimei book akhat pa lana kadam lacham mo.

Kaikhun meiguai tuang rasuai gan khou gin tarai guang puni khatni nthuk mei lam khang guang puni, rakalum mei gan tei thu suai nu mak ge. Kalam kiu tho, nangrui gin tarai guang mei ta ariu khuni ham e thei Raguang le kadam la ncham kho cho tuna sing-ring bam khou tei, mi hei thai lou o, Raguang rui nanglung ningta jao bam e. Kumpui jangrui, kaikhun tuang nthuk kanmei rasuai gan tei suai nu mak ge; nangrui nthuk na piu bam pukhou mansei guai hu khou gaimei tan lian lou tuang e. Kaniu rui nangta sinnui-mala e thei, suaihiam me tuna kakhan no. Jingbang khuang tachat (8:00 pm) khou naptu tang lana nangra na nang lungning ta

jaomin na jao kei o, kumna jingbang  
rasuai suai na jip tat tho.

Kaikhunpou tei rui kaikhun meiguai  
karu khou salou mei thiak piu chui na  
piu khang jailou nina e. Karu khou  
kumna suni na e tuna hi lou mei tuang  
latdan (rules) guai hei Sunday kathui  
khatni buh tuang reimei tingmik  
kathui khou kaikhun mei guai khou  
papat lou o.

## Part 2

# NAHNUN TA KASIAM

## THAOMEI

1. Pui pu, nahnun ta makuat thao ni mei hei nangniu khang inthukliangmei khatni nangniu panti khou kahoumei tanduan the. Nahnun guai hei inthukliangmei, kungmei lan nangniu khang ngampri Raguang rui insin lou tuang the. Nang mihei ningtou o mi du guai tihei Jisu Khrista rui nangniu ban khou insinlou the miku thu, katuang inthukmei jeirui suthanlou khang khatni kabang nun tisu lou khang khatni kham mei latjan nung kakhou katgut dat ngam nina the. Pui pu khuai khou rui nanun maikuam khou man kan ne theithu, kaniuta guloumei adi nian puni cho, pui pu rui jaosin nian loumei hei, Origen, theologian thai du meipu rui milam khou sa e. Nanun guai ta seitan tuang tan khou rui puipu khammei latjan nung maikuam ta ngam lou e thei, kalam thu mitei nanun tuang tan khou rui Raguang rui kaniu puatrit phung lou the. Nangniu gansu gandao keipui

gan khou nangchun rui nangniu  
nanun ta nang daeng khou tibam ni e  
thei, kaniu ramthai patmei gan khou  
Khristian kheiliak gaimei chamlou tio.  
Kaniu alao gan khou kaipouta  
pingmak khatni jianmak ge thei, kapui  
kapu ta jianmak khatni pingmak  
khatni chakhuang su mak puni. Puipu  
guai hei nanun ta kaipou khou katgut  
dat dat na kaniuta inthanmei kaikhun  
khou huainei nina the kamung guai  
na khang pui rasuai hei Raguang rui  
daolou puni kaniu nanun khang  
huainei pui gan khou.

2. Alao nun hei daithao pui gan khou  
kalum mei thiak incham lou tio, Jisu,  
Mary le Joseph jan khou. Alao guai rui  
inthanmei kaikhun maengta thuai  
hian na kaputna khatni chakhuang  
suna kalum khang incham lou tio.  
Kaniu latsa thai kahou puile rasuai  
duimei suna inchamlou tio,  
Poubaumei rasuai, He riu e Mariam  
khatni banchra rui riu mei rasuai  
baimei ni cham lou tio. Kaniu taektu  
chanaa mei titu lou na, kaniu du rui  
mi guai thei akum na lalou ni cho

- khatni bang kariu ni cho tumei tei tan lou tio.
3. Alao guai ta kaibang khou de tuna ti paliew na tibam lou rio. Alao guai hu khou guangtang mak mei lat khatni inthip inbei mei lat sa rio, kaniu guai sabam mei lat hei thai ni tuang ram me, tuna Khristian guangdi nanun rui sini sa e. Aniu hei pui rui puan lou tuang ham me, tiki kaniu ram thai puigan khou kaniu rui sa ye alao thiam mei guai ti hei tingriu mei gan khou tingkao thang rui tikei tuang nge ham me thei tung khou rui hou tuang de tuna sa ye.
  4. Gansu ganthaota chakhuang sumei phan, alao guai ta puipu jipmei bam khou tijip lou rio. Tunaa ingaan guaita ni kailung khatna khou tijip lou rio. Seitan rui kaniu thaimak mei kheiliak cham lou puni.
  5. Alao thiam lang mei guaita gundai guai thei tali khang latdan ti rio, khatni kaniu pamrai thei ngan na, nanun ta jaosin thai makmei ta lumna alao nunta ganlou rio, jaosin kasi mei pu rui na ta su kasi e.

6. Nanun daithao puitang, kaniuta school thou lou e. Puipu guai rui kagan kagan khou tatna kapam karai, akum cho tuna jao o. Katuang prikha che jao khatni kamei akum mei thiak khou incham cho tumei jao o. Sunday pum hei nanun hei akum mei thiak khou incham cho tumei jao han lou ni na e.
7. Nanun guai ta riangluai kai khou tibam tat rio, banchra suna lung lou mei tei kagan gei thu seitan suna hanguang datre.
8. Alao nun hei tingkum chanei tang pukhou kaniuta chu khana incham louna khatni akum na mi hei tanpat ni cho tumei incham lou o. Inthukmei suna suaihiam loumei pui ta kalum mei lam din lou o.
9. Thuaihianmei khatni sinsu tip lang nge thei alao guai hei seitan su e, kum na inguai kaluak lang ni alao guai ngam sam sam mei lungpuam inchin lou mei khatni dandi timei hei lum mei khatni jakman makmei tilou e. Khatni saeng thao daithaomei luai ngam makmei kaniu khou nai ye.

Kaniu ta han datna tan na mei pum tuang ti rian na dandi timei hei rui akum mei jang dandi ti tuang cho. Kumna kaniu guaita inthukmei mung khou khatni tujang pui gan khou chakhuang nai khang mi mung guai khou khuksun kei khang suni na re. Kaniu ta cham chei pui gan khou simei kheiliak bunkei lou bam nu e, alao guai hei lum numei rui tikai bam nu e, kum me tiki kaniu daithao dat pui gan khou kaniuta cham kaluai dat khang nai the. Pui rui nanun ti hei pu ta chakhuang champou thai khang ti chada ni na re. Hei jang rui pu guai ni nanun ta katuang kheiliak rui puita jianmei khatni chakhuang thaimei lun rui incham ni na re. Pui pu rui khat le khat ta chakhuang mak ge thei injianmei mak ge thei, nanun guai ni kaniu ta chakhuang nai ni tuang ram me.

10. Alao guai ta muang ahei mei kheiliak simei namtumei mi hei thu kalun lung tuang thiak de tuna incham lou rio, kaniu rui kandimei khou kaningsina taan pat puni. Nang rui kakheiliak simei ariu pukhou tining tou louna

incham lou tio. Inchum mei khou latjan rui kabang bi su thao khang incham lou tio.

11. Banchra rui riumei kaeng hiu pui gan khou khatni kaikhou bam pui gan khou ram khat dithe tumei tithai lou o. Kai khun kalum mei gan luai rap puile puipu ta khatni kachai nunga chakhuang suna kaban khou kaput khang ncham lou o.

Alao guai rui tingkum runa kanei tang pukhou, kaniu hei saengthao daithaomei ta kham nam mei gan ne, hei jangrui kaniuta khum ngai khou, nousuan kai khou ram me thei, kakum kagan khumngai khou indiu lou o. Kaniu chik chin mei hei kaikhun khou rui incham lou mei tei, gan dai thao pukhou katan guai tan chui ngam puni. Intumei khang khumgai khou nousuan kai khou puanrai karu mei hei gangmak mei khatni chapriak tuang maikuam ningtha sumei ye.

12. Kana lu nun ta kaman kung kungmei puanrai karu lou na maeng kasiam lou mei hei lung gai chingkhiu mei lian tuang nge. Khatni ngam sam sam mei

lian tuang nge. Mi lung gaimei lian lou khou tei rui mei pei na du ta pap maitiang khou jailou ye. Intumei maru sumei thu mangui nai mei, hougaimei, jianlou thaimei sipsipmei khatni karana ta jaosin riap thai mei mi hei thukliangmei ye.

13. Alao gannei agai agi bam khou ganthao guai kajao na lat agi nu mak ge. Gandai gansaek thu thou kum mei thu baisu baira lou sini, lalou me hei kum mei nun tei alao nun tan guang dat nimei khangta lungsum lou tuang nge.
14. Alao nun hei daithao pui gan khou kaniu khang ning tha su khang kapanti chaeng khou khang kada the. Mi tei Raguang rui sum lou puni kapanti tan luan khou, alao guai rui inchum mei chaeng phu khang kathou the. Mi tei pui pu rui tan ni mei tan ram the. Thou kum mei puipu guai nanun guai kaniu rui laan mei rui maikuam sumei rui padik na kao ran na tan lou the. Kumna panti khou pat ni mei hei kumna tan ni the tumei tei ingaanmei rui tingkum 16-18 intumei rui tingkum 14-16 tang khou tan ni mei tei nian nu

mak khe. Kaniu machun khou maru suna tianmi mak khou gangnu mei cham dan ne. Khatle khat ta alam na mei changkuam nimei khatni kagun kaga jao mei phan tei inban ram gai ta jao ye. Kum me thei thu neila jang gaimei phang ni mei phan tei puipu khatni nanun khou lung rianramei inthaek makna nai puni.

15. Puipu rui katum kaluakna tithai loungam mak mei khatni kaniu lung khou rui taan pat nimei tei tan thung ngam mak mei nai e. Nu e thei tho kai khun khou puatrit jaosin khang inpat lou mak khang nge. Thou kum mei puipu rui kaikhun tuang rit tei phung tan pui le ram guai inpat lou du e.
16. Pui pu guai tat tan kanpui tang kananun rui kakai khun ta kasiam thao dat re. Pui pu guai rui lungning than ne thei nanun guai rui naimei puat guai injan ne. Nanun guai rui kai khun khou nai meipuat guai tei injan khang latding su thao the. Khatni kaniu pang khou incham mak mei khatni lungcham mak mei pap tei puipu rui phung puni.

Inkham khou nanun thiu, pui pu ta chakhuang su o tuna Raguang latdan rui kham bam me, khatni lum de tiki tan pat makna puat rit guai tei. Nang rui ning tou o. Hei kiu thu Raguang latdan padei ta tibak pui jang rui Raguang rui nangta jaikei lou puni. Thei mei tang na khang ram me tiki intao khang ni ye.

Japan khou insi singmakmei rariak guangdi nai khuan ne, kana kathum le kapui le tuna lung bam khuan ne. Lungsi rianra puijang rui kapui ta jaosin ngam mak khuan ne. Mi guangdi khou tei kaihou mei ta thaengluai ni na de tumei latding kalai makna nai khuan ne. Kaihoumei ta nim toumei khang kadou chaimei suan ti puni tuna sa khuan ne. Kumna kaluan chamei tilou puijang rui khatni kapui khang puat chei gairan mei tilou ni pui jang rui, kana impou akhat tei kaihou mei pu khat sukhang su the, kumna gan nei tei rui pei kai khou tilou the, kumna kaniu tei suan la kan the. Kangkai pou khat tei rui chana gan nei rui jian kaluak meilun hou the. Inkham mei tan kangkai khou bam

mei puta taan lou mei hou the. Kapui  
jang khang rui thei nu mei bam khou  
ariu lou mei ta timachuang lou the.  
Kamei rui hei kum mei tan mungta  
jaona kalam phu the. Kangkai khou  
jaobam mei putei thai pat the thang  
luai nimei chanatapei tumei thu kapui  
ram lungaikhang rui kara na panti  
tipat lou ni mei khang ta. Mitei guang  
khou salou the, kum tina karana ta  
ham na kachana tani patlou the. Kum  
me tiki kapui ta thei mei ngan jaosin  
bam khang nuna kaluai lou the. Na  
guai thiu pat kan mei pari guai hei  
ningtou o.

**Inthanmei Kaikhun Tuang**  
**Father Kuriakose Elias**  
Mannanam Tuang Prior  
Khatni Baimei TOCD tuang  
Monasteries

13 February 1868

# **SAINT KURIAKOSE ELIAS**

## **CHAVARA RUI**

### **LUNGLOUMEI PARI RUANRI**

Inthanmei Kuriakose Elias Chavara hei 10-02-1805 kum puan lou the. Kainakary nam Alleppey District Travancore nam khou puanlou the. Kamei hei kailuang khou school kulou rei the, mitang kamei Pallipuram Seminary khou kajao lou the. St. Mary's Church le intin mei fuam the. Father Thomas hei katuang din pou sulou ye, kamei hei thuai hian mei sciences tuang professor akhat khuan ne. Saint Kuriakose hei 1827 kum hei Sub-Dioconate kulou na 1828 kum rui kamei Diaconate sulou datna 29 November 1829 kum St. Andrew's Church Arthunkal khou amu suam lou the. Kamei hei alao panti suna Jisu Jan khou Gaicham din tat mei pu khuan ne. Kumpui jang rui Khrista fuamling khang kapum kat pat lou the.

Kamei amu suam taan pui tang Father Thomas Palackal le Father Thomas Porukara Katuang dinpou kaniu rui Bumaeng kaidai akhat kasiam thao lou the. Brother Jacob Kanianthara panti khou

Gailiangmei inban rui ning tangmak mei kasiam lou the. 1831 kum Mannanam nam khou fuam khat lingthao lou the, minam jan tatei Beth Rauma (Ching Tuan khou kasiam thao lou mei kai tuna kasiam lou the) Beth Rauma tihelungniamna bum kei mei khatni kahou thaomei bam akhat the. Mibam khou tei rachap amu nun rui rei mei suna kahou thao lou kan ne. Mi bam tatei kapui bunglung khou rui pap mak na puan pat mei bang pui bam tuna thai lou the. Mannanam kaomei nam khou hei rachap tatmei nun guang kaduai mei bam khat kasiam thao lou the. Minam jan khatni fuam jan tatei Carmelites of Mary Immaculate (CMI) tuna kao lou the. Father Thomas Palackal le Father Thomas Porukara kanei hei 1841 khatni 1846 kum thei kan the.

St. Kuriakose tuang dinpou thei taan mei tang St. Kuriakose rui CMI fuam tihei karit lana tanpi suna phunglou the. 1861 kum St. Kuriakose ta hei Archbishop Verapoly rui St. Kuriakose ta Vicar General Syrian Catholics khang suam lou dat the, kamei rui fuamling kak khou bak pat mei ta Bishop Roccos guang mei gan khou

Malabar Church ta ti katuak mei guai ta ri adou kan ne.

1831 kum khou rui thaona St. Kuriakose rui mansei guai ta khuam kaduai na bumaeng tan khatni fuam tuang tan taan thao lou kahou the. Mannanam gaengjang khou Sanskrit School hei ling thao lou the. Hei na hamna latrik cham mei bam saengthao daithaomei bam ni aju taan pat lou the liturgy ni kaluan chamei khou kasiam kathan lou the Sunday sermon hei ni ti inbu thao lou the, khatni bumaeng tuang lung lai mei taan ni aju taan lou the. Parish kathui khou ni retreat ni gei na taan pat lou the. 1866 kum dat rui India khou bam mei intu mei nun khang ni rachap fuam rei mei suna ling lou the, mi fuam jan kiu thu Congregation of the Mother of Carmel (CMC) tuna kasiam thao lou the.

St. Kuriakose rui tingkum chanei dou Koonammavu Kerala khou taan dai taan lou duna 3 January 1871 kum thei kan the. Kamei ta St. Philomena's Church Koonammavu khou fup lou the. Kanakmei tang 24 May 1889 kum Koonammavu khou rui la kalai datna St. Joseph's Monastery rakalum mei bam Mannanam khou lou dat

kan the. Mi bam jan tatei CMI tuang fuam tuna kao lou the.

St. Kuriakose ti hei chumjina raningmei khang kapanti katpat mei puye tumei than thiak na thai ye. Kapan khou rui ram guai gai na phang ngam me. St. Alphonsa hei India khou reiliangmei saint akhat the. St. Kuriakose khou huai nei pui gan khou katuang sunu guai gai ngam kan ne, kamei ta tigai lou mei tei than thiakna kaban rui hilou mei nai ye.

Father Kuriakose rui rachap fuam khou tan taan thao mei hei 1956 khatni 8 February 1986 lungkhou the. Rachap fuam tuang taan tumei thu inthanmei tutuang nge. Kamei ta inthan mei taan ti machuang thao lou mei hei Pope John Paul II rui Kottayam, Kerala khou tan lou kan ne.

Joseph Pennaparambil katan chuan chai mei pu ye kamei hei Calicut, Kerala mei pu e. St. Kuriakose khou huai nei pui pan khou rui kamei suaihiam latou na kamei gai dat kan ne. Mi chrinmei taan hei taan lou mei tihei Maria Jose Kottarathil Pala, Kerala mei pu rui chum the tumei hei mei gei na khou khatni Vatican khou inthan na kao dao pat kan the. 18 March 2014 kum

Pope Francis rui St. Kuriakose ti hei suaiham phang chang mei pu dithe tuna latding lana kao pat kan the.

23 November 2014 kum rui St. Kuriakose tih ei canonized dithe tuna khatni inthan mei dithe tuna Pope Francis rui kao lou kan the. St. Kuriakose tarou hei khatni kapum tei la kadai na St. Joseph's Monastery Mannanam tuang racha hu khou lou dat kan the (Fup lou kan the).

# KAIKHUN KHANG SAINT KURIAKOSE KHOU HUANEI MEI RASUAI

He Raguang thuan ku ye nang rui aniu khang St. Kuriakose ta tilou pui jang rui, khatni aniu kai khun pi suna tilou pui jang rui, ram guaina khou kaoliangmei kupu kana khatni bumaeng inthanmei.

Inthanmei kai khun khang huai nei lou mei St. Kuriakose aniu khang huai nei lou o, kum me thei chujaengmei injianmei, lungchammei, neila jangai mei rui aniu kai khun ta gaek lou diu, incham na lum mei khou inbu thao khang inkha lou o. Katuak mei guai ta khatni ram mung guai ta kan louna Raguang jaojian khou lung ngam khang, incham lou o. Raguang rui chun mei khou taan ngam khang khatni kaling meih mei sungam khang, Raguang himdai mei khou lung ngam khang khatni aniu chun ning khou rui Raguang guangdi guang khang aniu lung ning ti tan lou o. Gai tan taan ngam na khatni amu sungam khang khatni aniu kai khun khou inthan mei panti tithao khang khatni nangtuang ngamta aniu rui lum the. Nang rui aniu ta

gaek lou khang nei ye, mi kaguai na hei.  
(Matat khat rim rim na kalum mei guai kat  
pat mei) Aniu pu poubau Jisu Khrista pan  
khou rui. Amen

1 Poubaumei Rasuai, 1 He Riu e Mariam,  
1 Kapu Kana Khatni...

**SAINT KURIAKOSE ELIAS**  
**CHAVARA TUANG**  
**MARU SUMEI PANTI**

10-02-1805	Kum Kainakary, Kerala khou puan lou e
18-02-1805	Kum Chennamkary Parish Church khou duilup lou e
08-09-1805	Kum Vechoor Church khou suaihiamlou mei inthanmei pui bang khou katlou mei
1810	Kainakary Primary School ku kahou mei
1818	Pallipuram khou Seminary kajaomei
29-11-1829	Arthunkal Church khou amu suam mei
11-05-1831	Kum CMI fuam reimei suna India khou lingthao lou mei Father Thomas Palackal le Father Thomas Porukara
1831	Kum Sunday gaicham tinbuloumei Kerala gaengjaeng khou amunun khang khatni mei cham guai khang tan lou mei khatni retreat lengpat lou mei
1833	Kum Mannanam fuam khou

	Syro-Malabar khou mei guai nah khang amu suni mei guai khang kaibang kasiam lou mei (Common Seminary) kasiam lou mei
1838	Kum rui Cross chaeng tatmei lam khatni kalum mei lam din loumei
16-02-1844	Kum hei rui rakai khou dinpou khang amu suam kathan mei guai nuan kingkhang fuam khat khou tanpat tangut tipat tigut khang khatni leirik leisu chamna guai ta jaosin khang dinpou khang kada lou the
03-07-1846	Kum rui Mannanam Syro- Malabar fuam khou leirik hina injan patmei kai kasiam reimei suna lingthao lou the
1846	Reiliangmei suna Catholic Sanskrit School Mannanam kailuang khou lingthao lou the
1853	Kum rui fuamling tuang tanluan tumei thu (Catechumenate) hei rei mei

	suna Syro-Malabar, Mannanam nam khou tan lou the
08-12-1855	Kum rui amu suni mei guai khang amu suni the tumei indaomei tan bam India raningmei guai khang tan lou the, Gan ru dou kajao na
1856-1857	Kum rui Christa tuang inchum mei guloumei pu tuang palupmei thiak hei aruh dou kasiam lou the
27-07-1861	Kum rui OCD lamluai nanumei fuam kathum tangmei, tan gutnumei Carmelite Discalced TOCD tuna kasiam lou the
08-06-1861	Kum rui Syro-Malabar Church khou Archbishop tang reimei Vicar General khang kada lou the
1861	Kum rui Bishop Roccos ta nunamakmei khatni lalou makmei Syro-Malabar fuam jang khang adou mei
1862	Kum rui reimei suna Malayalam mei nun tuang ruanri himei khatni rachap

	khang thai loumei nun pari hi mei
1862-1869	Kum rui Malabar fuam khou inthanmei pui fuambam kasiam loumei theimei nun fuam bam kasiam loumei liturgical calendar kasiam lou mei Liturgical lu lat phuak lou mei khatni amu guai tuang fuam khang Raguang tanbam kasiam pat lou mei
1864	Kum rui Mannanam khou inthanmei suaihiam lou meipui lam din lou mei
1864	Kum rui Sryo-Malabar fuam khou Vicar General suna fuam khang School tan lou mei
13-02-1866	Kum rui India khou bam mei intumei guai khang fuam khat kasiam lou mei mikiu Congregation of the Mother of Carmel (CMC) Koonammavu le Father Leopold OCD Italian rachap meinun
15-02-1866	Kum rui Kerala

	Koonammavu kaomei nam khou khuang 40 riakdei kalum kunna huainei mei lam din lou mei
02-01-1868	Kum rui Father Leopold OCD le tuna Koonammavu, Kerala khou reimei suna intumei guai khang boarding kasiam lou the
13-02-1868	Kum rui reiliangmei suna dirlou the mi kiu Christian kai khun hei reiliangmei fuam tuang bam akhat tuna buk laona kasiam lou the, Christian kaikhun guai khang, mi kiu injian diangmei pu tuang lading tu e
1869	Kum rui St. Joseph rui neilamei ram thei tei rui inkha thaimei khatni mei cham guai fuam akhat lingthao lou the
1869	Kum rui Kainakary khou kakai makmei guai, gansu gan thaoguai, sunu naonian mei guai khang reimei suna kai bam akhat ling thao lou

	the
1869	Kum rui Catholic mei ta lungthaona lungcham dat khang khatni thauna nai dat khang kasiam lou the
03-01-1871	Kum rui Koonammavu St. Philomena's Monastery khou kaipou khou jipri gui gui mei bam tuna kasiam lou the
04-05-1889	Kum rui CMI tuang fuamundai St. Joseph's Monastery Mannanam khou kapum lou gut kaluai dat mei
21-12-1936	Kum rui fuam tuang level khou rui fuamling tuang taan tan kahou mei
09-12-1955	Kum rui fuamling tan ning tha suna tankhang tipat mei
03-01-1958	Kum rui Raguang tuang bang jan phuak khou rui diocesan khou taan thaomei
07-04-1984	Kum rui Pope John Paul II chakhuang sunu the tuna kao dao patmei
08-02-1986	Kum rui Pope John Paul II rui Kerala Kottayam khou ti

	hou gai lou dat mei
20-12-1987	St. Chavara lungdingmeipu ta Indian Government rui lalouna postal stamp ti patmei
04-05-2006	Kum rui inthanmei Chavara rui Literary Academy Hall khou laanlou kane Malayalam literature khang Government of Kerala rui tilou mei
19-10-2014	Kum rui Kerala Sahithya Academy rui kandi mei khou tithai pat mei
23-11-2014	Kum rui Pope Francis rui Kuriakose Elias Chavara ta rachap luan khou inthanmei tuna tithai lou mei

*Nang rui thai ni ye thei:*  
**Chavara Central Secretariat**  
CMI Prior General's House  
Chavara Hills, Kakkanad, Post Box 3105  
Kochi 682 030, Kerala, India

Ph: +91 484 2881802  
[www.chavaralibrary.in](http://www.chavaralibrary.in)